



SAOPŠTENJE ZA JAVNOST

Potvrđena optužnica protiv instruktora S.Ć. zbog falsifikovanja dokumentacije za polaganje vozačkog ispita

(Brčko, 19.06.2025. godine)

Tužilaštvo Brčko distrikta BiH podiglo je optužnicu protiv lica S.Ć. (58)* iz Brčkog, po zanimanju instruktor za vožnju B kategorije, zbog osnovane sumnje da je počinio kivično djelo „Falsifikovanja ili uništenje poslovnih ili trgovačkih knjiga ili isprava“ iz člana 255. stav (1) u sticaju sa krivičnim djelom „Falsifikovanje isprave“ iz člana 367 stav (1) Krivičnog zakona Brčko distrikta BiH u vezi dokumentacije za polaganje vozačkog ispita.

Podsjetimo, u mjesecu martu 2025. godine Tužilaštvo Brčko distrikta BiH je zaprimilo krivičnu prijavu zbog uočenih nepravilnosti u radu određene auto škole iz Brčkog i instruktora za vožnju B kategorije S.Ć. (58)* prilikom stručnog osposobljavanja kandidata D.Š. za polaganje vozačkog ispita. Usljed uočenih nepravilnosti Odjeljenje za obrazovanje Vlade Brčko distrikta BiH ovom kandidatu koji je inače i učenik završnog razreda srednje škole u Brčkom, posljedično nije izdalo potvrdu o položenom vozačkom ispitu koja mu je potrebna za redovan završetak srednje škole.

Cijeneći sve specifične okolnosti predmetnog slučaja, Tužilaštvo Brčko distrikta BiH je prioritarno u vrlo kratkom periodu poduzelo sve istražne mjere i radnje u cilju prikupljanja dovoljnog broja relevantnih dokaza koji ukazuju da je osumnjičeni S.Ć. (58)* iz Brčkog u periodu od 31. januara 2025. do 12. februara 2025.godine postupajući kao instruktor za vožnju B kategorije u Dnevnik rada instruktora vožnje unio neistinite podatke da je kandidat D.Š. svaki dan obavljao po dva časa obuke vožnje putničnim motornim vozilom, te u rubrici potpis kandidata umjesto kandidata on potpisivao njegovo ime i prezime odnosno potpisao se imenom i prezimenom druge osobe, iako je znao i bio svjestan da kandidat u tom periodu nije uopšte obavljao praktičnu obuku za vožnju.

Obzirom da se radi o krivičnim djelima s propisanom kaznom zatvora do pet godina ili novčanom kaznom kao glavnom kaznom, a za koje je prikupljeno dovoljno dokaza koji pružaju osnov za tvrdnju da je osumnjičeni učinio krivično djelo, Tužilaštvo Brčko distrikta BiH je u skladu sa Zakonom o krivičnom postupku podiglo optužnicu u kojoj je zatraženo od suda da izda kazneni nalog u kojem će se optuženom izreći jedinstvena krivičnopravna sankcija bez provođenja glavnog pretresa.

Postupajući Osnovni sud Brčko distrikta BiH potvrdio je predmetnu optužnicu dana 18. juna 2025.godine i zakazao ročište za izdavanje kaznenog naloga.

**ZAMJENIK
GLAVNOG TUŽIOCA
VLADIMIR TEPAVČEVIĆ**